

類症普濟本事方卷第九

傷寒

治結胸灸法

巴豆十四粒

黃連七寸連皮用

右搗細用津唾和成膏填入臍心以艾灸其上腹
中有聲其病去矣不拘壯數病去為度纔灸了便
以溫湯浸手帕拭之恐生瘡也

鵲石散

治傷寒發狂棄衣奔走踰牆上屋

黃連

寒水石

各等分

右為末每服二錢濃煎甘艸湯放冷調服

桂枝麻黃各半湯

在前

嘗記一親戚病傷寒身熱頭疼無汗大便不通已
四五日予詢問之見醫者治大黃朴硝等欲下之
予曰子姑少待予為視之脉浮緩卧密室中自稱
甚惡風予曰表症如此雖大便不通數日腹又不
脹別無所苦何遽便下大抵仲景法須表症罷方

下不爾邪乘虛入不為結胸必為熱痢也予作桂
枝麻黃各半湯繼之以小柴胡漿漿汗出大便亦
通而解仲景云凡傷寒之病多從風寒得之始表
中風寒入裏則不消矣擬欲攻之當先解表乃可
下之若表已解而內不消大滿大堅實有燥屎自
可徐下之雖四五日不能為禍也若不宜下而便
攻之內虛熱入協熱遂利煩燥之變不可勝數輕
者困篤重者必死矣

元本正文重疊難曉予
刪正此段其理甚明

大抵

風寒入裏不消必有燥屎或大便堅閉須是脉不
浮不惡風表症罷乃可下大便不通雖五六日不
能為害若不顧表而便下遂為協熱利也

抵當丸 治瘀血

水蛭 炙

蜚蠊 去翅足炒
各五枚 桃仁 六枚

大黃 五分
去皮

右為末煉蜜和作一九以水一盞煎至七分頓服
晬時當下血不下再作之

有人病傷寒七八日脉微而沉身黃發狂小腹脹
滿臍下冷小便利予曰仲景云太陽病身黃脉沉
結小腹硬小便不利者為無血也小便自利其人
如狂者血症諦也投以抵當丸下黑血數升狂止
得汗解經云血在上則忘在下則狂太陽膀胱隨
經而蓄于膀胱故臍下膨脹由闌門便滲入大腸
若大便黑者此其候也

破陰丹 方在前

有人初得病四肢逆冷臍下重痛身疼如被杖蓋
陰症也急取金液破陰來復等丹其脉遂沉而滑
沉陰也滑陽也病雖陰而見陽脉有可生之理仲
景所謂陰病見陽脉者生也仍灸氣海丹田百壯
手足溫陽回得汗而解或問此脉之狀如何便有
生理予曰仲景云翕奄沉名曰滑何謂也沉為純
陰翕為正陽陰陽和合故名曰滑古人論此脉雖
云往來前却流利旋轉替然與數相似仲景三

語而足也此三字極難曉翕合也言張而復合也
故曰翕為正陽沉言忽降而下也故曰沉為正陰
方翕而合俄降而下奄為奄忽之間仲景論滑脉
可謂諦當矣然其言皆有法故讀書難曉

補脾湯 治傷寒得汗瘥後脾胃傷冷物胸膈不快

尋常氣血不和

人參

乾薑

白朮

甘草

橘紅

青皮

去白各等分

右為末每三錢水一盞煎數沸熱服入鹽點亦得
又記有人患傷寒得汗數日忽身熱自汗脉弦數
心不得寧真勞復也予診曰勞心之所致神之所
舍未復其初而又勞傷其神榮衛失度當補其子
益其脾解其勞庶幾得愈授以補脾湯佐以小柴
胡得解或者難曰虛則補其母今補其子何也予
曰子不知虛勞之異乎難經曰虛則補其母實則
瀉其子此虛當補其母人所共知也千金曰心勞

甚者補脾氣以益之脾旺則感之于心矣此勞則
當補其子人所未聞也蓋母生我者也子繼我而
助我者也方治其虛則補其生我者與錦囊所謂
本骸得氣遺體受蔭全義方治其勞則補其助我
者與荀子所謂未有子富而父貧者全義此治虛
與勞所以異也

治中喝白虎湯

方在本
論中

有人頭痛身熱心煩燥渴脉大而虛予授以白虎

湯服愈仲景云脉虛身熱得之傷暑又云其脉弦
細芤遲何也素問云寒傷形熱傷氣蓋傷氣不傷
形則氣消而脉虛弱所謂弦細芤遲者皆虛脉也
仲景以弦為陰朱肱亦云中暑脉微弱則皆虛脉
可知

麻黃湯

方在前

有人病傷寒身熱頭痛予診之曰邪在表此表實
症也當汗之以麻黃湯或人問曰傷寒大抵因虛

故邪得以入之今邪在表何以言表實也予曰古人稱邪之所湊其氣必虛留而不去其病則實蓋邪之入人也始因虛及邪居中則反為實矣大抵調治傷寒先要明表裏虛實能明此四字則仲景三百九十七法可坐而定也何以言之有表實有表虛有裡實有裡虛有表裏俱實有表裏俱虛予于表裏虛實歌中嘗論其事矣仲景麻黃湯之類為表實而設也桂枝湯之類則表虛而設也裏實

則承氣之類是也裏虛則四逆之類是也表裏俱實所謂陽盛陰虛下之則愈也表裏俱虛所謂陽虛陰盛汗之則愈也嘗讀華佗傳有府吏倪尋李延俱頭痛身熱所苦正同佗曰尋當下之延當發汗或難其異佗曰尋內實延外實故治之異

小柴胡湯

柴胡 二兩

黃芩

人參

甘草 各五分

半夏 六錢一字
洗七次

右為粗末每服五錢水一盞半薑五片全煎至八分去渣溫日三服加減法活人書所載甚詳

有人患傷寒五六日頭汗出自頭以下無汗手足冷心痞悶大便閉結或者見四肢冷又汗出濇悶以為陰症予診其脉沉而緊予曰此症可疑然大便結非虛結也安得為陰脉雖沉緊為少陰症然多是自利未有秘結者知此症半在表半在裏投以小柴胡得愈仲景稱傷寒五六日頭汗出微惡

寒手足冷心下滿口不欲食大便硬脉細者此為
陽微結必有表復有裏脉沉亦在裏也汗出為陽
微假令純陰結不得復有外症悉入在裏此為半
在外半在裏也脉雖沉緊不得為少陰所以然者
陰不得有汗今頭汗出故知非少陰也可與小柴
胡湯設不了了者得屎而解此疾症候全故得屎
而解也有人難曰仲景云病人陰陽脉俱緊反汗
出者亡陽也此屬少陰今云陰不得有汗何也今

因頭汗出者故知非少陰何以頭汗出便知非少
陰症予曰此一段正是仲景議輪處意謂四肢冷
脉沉緊腹滿全是少陰然大便硬頭汗出不得謂
少陰蓋頭者三陽同聚若三陰至胸而還有頭汗
者自是陽虛故曰汗出為陽微是陰不得有汗也
若少陰頭有汗則死矣故仲景平脉法云心者火
也名少陰其頭無汗者可治有汗者死心為手少
陰腎為足少陰相與為上下惟以意逆志斯可得

之

治太陽陽明合病麻黃湯

方在前

有人患傷寒脉浮而長喘而胸滿身熱頭痛腰脊
強鼻乾不得眠予曰太陽陽明合病症仲景法中
有三症下利者葛根湯不下利嘔逆者加半夏喘
而胸滿者麻黃湯治以麻黃得解有人問傷寒傳
入之序自太陽陽明少陽太陰少陰厥陰所傳有
次第何哉予曰仲景本論無說古今亦無言者惟

龐安常謂陽主生故太陽水傳足陽明土土傳足
少陽木為微邪陰主殺故足少陽木傳足太陰土
土傳足少陰水水傳足厥陰木為賊邪予以為不
然足少陰水傳厥陰木安得為賊邪蓋牽強附會
失之穿鑿何不觀素問陰陽離合論曰太陽根起
于至陰名曰陰中之陽陽明根起于厲兌名曰陰
中之陽少陽根起于竅陰名曰陰中之少陽太陰
根起于隱白名曰陰中之太陰少陰根起于湧泉